

**Ucapan YAB Perdana Menteri, Tun Haji Abdul Razak bin Hussein,
di pembukaan resmi Pesta Pembangunan Negeri Johor
pada 14hb. Februari, 1974, jam 10.30 pagi.**

Saya sungguh berasa gembira kerana dapat membuat lawatan ke Muar untuk bersama-sama dalam suasana meriah ini dan seterusnya melancarkan Pesta Pembangunan Negeri Johor ini. Saya mengucapkan terimakasih kepada Datuk Menteri Besar atas penghormatan ini di samping mengucapkan tahniah kepada semua pihak yang berkenaan atas usaha mereka menganjurkan Pesta ini.

Hingga sekarang, Pesta Pembangunan seperti ini telah diadakan di beberapa negeri di Malaysia. Seperti dimaklum, tujuan utama kita mengadakan Pesta ini ialah untuk menggambarkan matlamat yang telah dicapai dan yang bakal dicapai melalui Rancangan Gerakan Pembaharuan di dalam pelaksanaan Dasar Ekonomi Baru. Seperti yang sedia maklum, Gerakan Pembaharuan ini telah dilancarkan hampir 1½ tahun lalu di Dungun, Trengganu, di mana saya telah mengarahkan segala rancangan pembangunan masyarakat dihubungkan rapat dengan strategi baru pembangunan negara. Adalah mustahak usaha-usaha pembangunan diselaraskan dengan pelaksanaan Dasar Ekonomi Baru yang mana adalah harapan seluruh rakyat untuk menjamin wujudnya kita sebagai satu bangsa yang bersatu. Memandang betapa mustahaknya Dasar Ekonomi Baru ini dijayakan sepenuhnya, hendaklah ada pembaharuan sikap, pembaharuan cara berfikir dan pembaharuan cara bertindak di kalangan semua pihak yang terlibat dalam rancangan-rancangan pembangunan baik rakyat mahupun pegawai-pegawai Kerajaan. Dengan demikian, dapatlah dijamin kerjasama yang rapat pada semua peringkat bagi mencapai kejayaan dalam pelaksanaan semua rancangan untuk kebajikan rakyat dan juga negara.

Sejak negara kita merdeka hingga hari ini, Kerajaan telah berusaha melaksanakan seberapa banyak rancangan pembangunan untuk rakyat terutama sekali rakyat diluar bandar. Kejayaan yang telah kita capai sejauh ini amatlah besar berbanding dengan apa yang dibuat dalam zaman penjajah dahulu. Bahkan tidaklah salah kalau dikatakan rakyat luar bandar tinggal dalam keadaan terbiar selama ini kerana pembangunan hanya dijalankan untuk kepentingan bandar dan penduduk-penduduk bandar sahaja. Bagaimana pun, kita tidaklah harus berpuas hati dengan kejayaan yang dicapai sejauh ini malahan kita perlu bergiat lebih kuat lagi untuk mencapai taraf hidup yang lebih tinggi setanding dengan negara-negara maju pada hari ini.

Tuan-tuan dan Puan-puan,

Gerakan Pembaharuan bolehlah dikatakan inti segala usaha yang kita jalankan oleh kerana falsafah pembangunan cara baru ini bukanlah semata-mata mengadakan kemudahan untuk rakyat sepertimana yang dilakukan dalam rancangan-rancangan pembangunan lima tahun yang terdahulu dari ini. Pada masa itu kita banyak menumpukan perhatian kepada kemudahan-kemudahan infrastruktur iaitu jalan, jambatan, mesjid, balai raya, hinggakan perigi atau telaga pun disediakan untuk rakyat dikampung-kampung. Tetapi ini bolehlah dikatakan tindakan sebelah pihak iaitu Kerajaan menyediakan bagi rakyat dan rakyat hanya menunggu nikmat itu. Kecualilah disetengah-setengah tempat dimana dijalankan kerja secara gotong-royong barulah rakyat yang berkenaan turut melibatkan diri dalam rancangan untuk kebajikan mereka itu.

Keadaan seperti ini tidak sesuai lagi dengan perubahan-perubahan yang berlaku disekeliling kita hari ini. Sebenarnya tujuan Kerajaan menyediakan kemudahan-kemudahan pada peringkat pertama itu sudahpun memenuhi sebahagian daripada matlamatnya iaitu hendak menaikkan sedikit taraf hidup rakyat daripada paras zaman penjajahan dahulu. Bagaimana pun, kita mengakui iaitu masalah pokok masih belum dapat diatasi iaitu kemiskinan rakyat dan keadaan ekonomi yang seimbang antara satu kaum dengan kaum yang lain, yang terpisah pula antara satu dengan lain kepada sesuatu jenis pekerjaan dan cara hidup yang berasingan. Pelancaran Dasar Ekonomi Baru, seperti kita maklum, adalah tindakan muktamad untuk mengatasi kedua-dua masalah ini dan seterusnya menjamin perpaduan rakyat dan kesetabilan negara untuk

masa hadapan.

Hakikat ini yang memerlukan perubahan sikap dan cara berfikir serta bertindak bukan sahaja dipihak rakyat bahkan juga dipihak alat-alat kerajaan yang menjalankan tugas-tugas melaksanakan dasar Kerajaan. Rakyat tidak harus lagi bersikap passive iaitu hanya meminta dan menerima kemudahan dari Kerajaan dan serentak dengan itu alat-alat Kerajaan dikehendaki mengetahui betul-betul hasrat dan harapan rakyat serta cuba memenuhinya kehendak rakyat dan tidak bertentangan dengan hasrat mereka. Pendek kata, saya ingin melihat dalam melaksanakan apa juga rancangan untuk kebajikan rakyat, patutlah dijamin penyertaan mereka pada semua peringkat supaya benar-benar mencapai hasil yang dikehendaki oleh mereka itu.

Tambahan pula patutlah diingat bahawa Kerajaan kita sedang berusaha memupuk semangat demokrasi supaya berakar umbi dalam kehidupan masyarakat dinegara ini. Oleh yang demikian, penyertaan dan penglibatan rakyat dalam usaha-usaha Kerajaan ini adalah cara yang sebaik-baik bagi menentukan supaya fahaman demokrasi itu berkembang subur dan kedua-dua pihak bersama-sama memikul tanggungjawab melaksanakan pemerintahan oleh rakyat dan untuk kesejahteraan rakyat.

Tuan-tuan dan Puan-puan,

Pesta yang kita saksikan bersama-sama di sini adalah gambaran yang nyata mengenai kejayaan yang telah kita capai dalam berbagai lapangan hidup. Sesiapapun tidak dapat menafikan bahawa Kerajaan yang ada sekarang ini telah berbuat dan akan terus berbuat apa yang perlu demi kepentingan dan kebajikan rakyat jelata. Di Negeri Johor ini Kerajaan Persekutuan telah pun meluaskan kegiatannya di bidang pembangunan ekonomi yang selama ini terhad kepada rancangan-rancangan FELDA seperti yang terdapat di Kulai, Kota Tinggi dan Mersing. Kegiatan FELDA akan terus ditingkatkan dalam kawasan Johor Tenggara dan disamping itu beberapa rancangan baru telah pun siap atau sedang dalam pelaksanaan seperti projek lapangan terbang di Sinai, projek pelabuhan di Pasir Gudang, projek Maju ternak, Maju ikan dan lain-lain lagi.

Selanjutnya bantuan akan terus diberi kepada Kerajaan Negeri dalam usaha memperluaskan kegiatan-kegiatan dibidang perindustrian dengan mengadakan industrial estate atau kawasan perusahaan di Tanjung Agas, Pasir Gudang, Segamat dan di Pontian, dalam bidang usaha membawa perusahaan-perusahaan baru ke bandar-bandar kecil ke luar bandar. Saya sukacita menyebutkan di sini semasa lawatan terakhir dua tahun dahulu orang-orang di Muar melahirkan perasaan kecewa kerana ketinggalan di belakang berbanding dengan Johor Bharu, Batu Pahat dan Kluang. Syukur Alhamdulillah, saya mendapati beberapa perusahaan baru akan masuk ke Tanjung Agas di sini dalam sedikit masa lagi dan akan membuka peluang-peluang pekerjaan kepada orang-orang Muar khasnya kaum belia. Begitu juga kita tahu sebuah perusahaan elektronik sudahpun memulakan kegiatannya di Pontian dan saya percaya beberapa buah perusahaan akan juga sampai di Segamat dan Mersing disamping sebuah kilang Simen yang dirancangkan di Kota Tinggi.

Saya berpuashati juga dengan langkah-langkah yang diambil oleh Kerajaan Negeri dalam usahanya memberi peluang penyertaan kepada Bumiputra dilapangan perusahaan dan perniagaan menerusi Lembaga Kemajuan Negeri dan syarikat-syarikat anaknya iaitu Syarikat Ladang Getah Teberau, Syarikat perlombongan perusahaan membuat cutlery dan syarikat perniagaan Sergam. Dengan adanya peluang-peluang yang ada itu demi kebajikan mereka dan anak cucu mereka pada masa akan datang. Bagi mereka yang ingin berusaha sendiri dan berdikari dilapangan perniagaan, banyak peluang akan didapati apabila PERNAS mula menjalankan urusan sebagai pembahagi disetiap negeri dalam sedikit masa lagi. Dengan adanya peluang-peluang yang saya katakan tadi, terpulanglah pada individu menunjukkan sikap yang positif dan berani tampil kemuka merebut peluang-peluang yang terbuka itu. Sebenarnya tidaklah perlu syarat-syarat istimewa atau pun ijazah melainkan kemahuan diri serta keazaman hendak berjaya dalam satu-satu jurusan samada di bidang pertanian atau pun perniagaan. Sebaliknya akan sia-sia sahajalah Kerajaan membelanjakan wang berjuta-juta ringgit yang disalurkan menerusi MARA, PERNAS, LPP, Bank Pertanian dan

sebagainya kalau rakyat sendiri tidak bersedia hendak memberikan sokongan yang bulat dan menggunakan peluang-peluang yang disediakan itu.

Bagaimanapun patutlah difaham juga bahawa peluang-peluang dan kemudahan yang disediakan oleh Kerajaan itu tidaklah mencukupi semua kehendak rakyat. Kita haruslah sedar bahawa yang diberi oleh Kerajaan itu hanyalah untuk asas permulaan sahaja yang perlu di sambung serta dilengkapi oleh rakyat sendiri. Adalah tanggungjawab mereka untuk berusaha menggunakan asas-asas kemudahan yang disediakan oleh Kerajaan dan menambah lagi dengan tenaga sendiri untuk mencapai kejayaan yang dicita-citakan itu. Berbeza dengan masa selepas kemerdekaan dulu, rakyat hari ini tidak seharusnya mengharapkan bantuan dari Kerajaan semata-mata, bahkan mereka hendak beraam memperbaiki diri sendiri.

Tuan-tuan dan Puan-puan,

Dalam Pesta ini kita dapat menyaksikan contoh kehidupan yang maju jaya dalam masyarakat modern. Pamiran yang diaturkan di sini semuanya mempunyai hubungan antara Kerajaan di satu pihak dan rakyat dipihak yang lain dan bagaimana penyatuan tenaga serta daya usaha rakyat dipadukan dengan perancangan dan kemudahan yang disediakan oleh Kerajaan menuju satu matlamat kehidupan yang sempurna. Ini intisari dari segala pengajaran dan pengalaman yang kita kehendaki dalam Gerakan Pembaharuan. Saya sukacita menyebutkan di sini iaitu Pamiran yang lebih besar diperingkat kebangsaan akan diadakan pada bulan April kelak di Ibu Negara kita, Kuala Lumpur. Tidak syak lagi, dari pamiran yang diadakan ini, rakyat akan dapat mempelajari serta memahami cara-cara membaiki keadaan hidup mereka dan saya harap hasil dari pengajaran yang didapati di sini akan menimbulkan keazaman baru serta keyakinan hendak ingin maju dan berdikari.

Saya percaya kalau benih-benih pembaharuan yang disemaikan menerusi Pesta seperti ini mula bercambah dengan subur ibarat sebuah kebun yang hijau, sudah tentulah cita-cita kita hendak membina masyarakat Malaysia yang moden dan progresif itu akan segera tercapai. Seperti yang saya tegaskan semasa melancarkan Gerakan Pembaharuan tahun 1972 dahulu, peluang-peluang seperti yang ada pada masa ini tidak akan terjumpa lagi, dan seperti juga masa, ianya tidak akan menunggu sesiapa. Sekali terlepas bermakna terlepas untuk selama-lamanya. Inilah kenyataan yang mesti difahami dan terserahkan kepada kita untuk bertindak segera mengambil peluang keemasan itu.

Tuan-tuan dan Puan-puan,

Seperti yang sedia dimaklum, Kerajaan telahpun mengambil langkah-langkah tegas bagi mencapai matlamat pembangunan menerusi badan-badan seperti FELDA, FELCRA, Lembaga Kemajuan Pahang Tenggara, Johor Tenggara, Jengka dan Trengganu Tengah. Kerajaan telah juga menubuhkan badan-badan dan agensi-agensi seperti MARA, PERNAS, Lembaga Pertubuhan Peladang, Lembaga Padi dan Beras Negara, RISDA, Bank Pertanian, Majukan, Majuternak dan lain-lain lagi untuk memperhebatkan lagi usaha-usaha pembangunan. Baru-baru ini Bank Bumiputra telah menubuhkan sebuah bank-anak iaitu Bank Pembangunan atau Development Bank untuk memenuhi keperluan tertentu. Dengan ini nyatalah bahawa Kerajaan telah berbuat apa yang perlu untuk kepentingan rakyat dan saya ingin melihat sambutan rakyat kepada rancangan-rancangan itu. Dalam bidang perniagaan, saya gembira mendapati bahawa sudah lahir segulungan rakyat Bumiputra yang berani menghadapi cabaran-cabaran dunia perniagaan. Saya berharap lebih ramai lagi rakyat Bumiputra akan berbuat demikian. Keberanian untuk menempuh cabaran-cabaran dengan tabah hati inilah yang dikehendaki dalam semangat Gerakan Pembaharuan.

Dalam pada itu patutlah difaham juga bahawa Gerakan Pembaharuan ini bukanlah semata-mata ditujukan kepada "physical progress" atau kemajuan kebendaan saja bahkan adalah sebaik-baiknya di-

perhatikan agar perubahan itu meliputi keperluan rohani juga. Manusia yang sempurna adalah dan hendaklah mempunyai kekuatan rohani dan jasmani dan hakikat inilah yang memberikan seorang individu keberanian dan keyakinan yang dikehendaki dalam Gerakan Pembaharuan.

Tuan-tuan dan Puan-puan,

Akhir kata, suka saya memuji pihak yang merancang Pesta ini kerana menggunakan segala daya fikiran dan imagination supaya Pesta ini betul-betul memberi kesan kepada rakyat. Saya sangat tertarik hati dengan Kampong Contoh yang diabadikan dengan nama Allahyarham Tun Dr. Ismail dan sesungguhnya ialah penghormatan yang bijaksana untuk mengenangi jasa-jasa beliau kepada Negeri Johor ini. Dengan itu, dari Pesta ini akan kekal sebagai sebuah perkampungan yang abadi untuk menjadi tumpuan pelawat-pelawat yang akan datang kemari. Pendek kata, perancangan seperti ini patut menjadi tauladan kepada Negeri-negeri lain yang bercadang hendak mengadakan Pesta mereka pada satu masa kelak.

Dengan itu saya dengan penuh sukacita dan gembira meresmikan Pesta Pembangunan Negeri Johor ini.



Gambar ini menunjukkan keriangon Allahyarham YAB Tun Haji Abdul Razak selepas melawat gerai LPP Negeri Kelantan di Pesta Kebudayaan yang telah diadakan pada 16hb. Julai, 1975.